

Minister Oduber lo financia di dos fase di Linear Park a traves di fondo TPEF

ORANJESTAD (AAN): Minister Otmar Oduber ta sumamente contento di por anuncia cu e di dos fase di Linear Park ta cla pa cuminsa, continuando cu e vision di sigui haci esaki un atraccion pa local y bishitante.

E construccion di e di dos fase ta bay worde financia door di Minister Oduber a traves di fondo di Tourism Product Enhancement Fund (TPEF).

Na e momentonan aki ta cientos di persona ta disfruta di e facilidadnan cu Linear Park fase uno ta ofrece.

Tur hende cu pasa eyan por mira specialmente den oranan di atardi/anochi un cantidad grandi di persona ta ehercita a lo largo di e Linear Park, mientras cu por mira famianan ta pasa un dushi tempo cu otro riba Plaza Turismo.


Amigonan ta topa otro, hobennan ta recrea, turistanan ta interactua cu nos hendenan, esey ta e vision cu Minister Otmar Oduber tabatin y awor el a bira realidad.

Awor ta asina leu cu tur cos ta cla pa inicia trabanonan pa e di dos fase di Linear Park cu lo bay for di rotonde di Las Americas te na e kazerne di bomberonan banda di aeropuerto. E di dos fase lo ta un continuacion di e promer fase caminda cu lo tin fietspad y voetpad, lugar amplio di parkeo caminda e dos miradornan ta situa actualmente, cual por cierto lo worde embeyece cu vegetacion adicional y bankinan pa sinta, siguiendo e concepto di e promer fase. Mester menciona cu e vegetacion existente lo

worde preserva, manteniendo asina nos flora tipico di nos isla.

Minister Otmar Oduber ta indica cu na momento cu Linear Park keda completamente finaliza e lo bira e linear park mas largo di Caribe cu un total di 10 miya cuminsando for di aeropuerto te Arashi. Importancia di un proyecto asina ta cu e ta eleva grandemente e imagen di Producto Aruba.

Awor for di momento cu turistanan yega nos isla nan por ripara e cambionan grandi cu ta tumando lugar, e mehoracion di nos Producto Aruba cu ta beneficia no solamente e bishitantenan pero nos mesun hendenan tambe. Esey ta e base di e proyecto di Linear Park, mehora nos producto pa tanto local como turista por disfruta y haci uso di dje. "Promer fase ta cla,



di dos fase lo cuminsa dentro di poco tempo y despues nos lo continua cu e siguiente fasenan te ora nos finalice por com-

pleto. Mi ta hopi orguyoso di por mira e resultadonan y mi ta sigur cu e desaroyo di e siguiente fasenan lo laga cada un di

nos sinti nos mes orguyoso di por conta cu un Linear Park di e caliber aki", Minister Otmar Oduber a duna di conoce.

MOTIBO VALIDO PA BAHIA CASTIGO!!



**Telefonan
di
DIARIO
582-8747
Fax
582-8551**